



**Rialtas na hÉireann**  
Government of Ireland

## **Máistir Gairmiúil san Oideachas (Múinteoireacht Bhunscoile)**

### **Na Riachtanais Iontrála agus an Nós Imeachta don bhliain 2022**

**1. Is clár iarchéime oideachas múinteoirí don mhúinteoireacht bhunscoile (2022-2024) é seo do dhaoine a bhfuil Céim Onóracha Bhaitsiléara ag Leibhéal 8 acu nó do na daoine sin a mheasann go bhfaighidh siad torthaí rathúla ina scrúduithe deiridh roimh an Aoine an 15 Iúil 2022.**

Is clár lánaimseartha é seo. Tosóidh sé i mí Mheán Fómhair 2022 agus tiocfaidh sé chun deiridh i samhradh na bliana 2024. Soláthrófar é sna hinstiúidí ardoideachais seo a leanas:

- Instiúid Oideachais Ollscoil Chathair Bhaile Átha Cliath, Campas Choláiste Phádraig, Ollscoil Chathair Bhaile Átha Cliath, Baile Átha Cliath 9. ([ioe@dcu.ie](mailto:ioe@dcu.ie)).
- Coláiste Mhuire gan Smál, An Cuarbhóthar Theas, Luimneach. ([admissions@mic.ul.ie](mailto:admissions@mic.ul.ie)). Is féidir teagmháil a dhéanamh leis ar Microsoft Teams/Lilian.Monahan@mic.ul.ie
- Roinn Froebel don Oideachas Bunscoile agus Luath-Óige, Ollscoil Mhá Nuad, Maigh Nuad, Co. Chill Dara. [froebel.department@mu.ie](mailto:froebel.department@mu.ie); Teileafón: (01) 4747400.
- Instiúid Oideachais Marino, Ascaill Uí Ghríofa, Baile Átha Cliath 9. ([admissions@mie.ie](mailto:admissions@mie.ie)). Teileafón: (01) 8057742.

Beidh líon teoranta áiteanna ar fáil ar na cláir sin agus roghnófar iarratasóirí rathúla trí bhíthin comórtais. Cuirtear in iúl d'iarratasóirí gur féidir go mbainfear úsáid as gearrliostú.

Maidir le daoine a n-éiríonn leo an clár seo a chur i gcrích, beidh siad incháilithe lena gclárú ag an gComhairle Mhúinteoireachta faoi Bhealach 1: Bunoideachas agus, dá bhrí sin, beidh siad incháilithe lena gceapadh i mbunscoileanna.

## 2. An Nós Imeachta Iarratais agus na Dátaí Deiridh

Tá dhá eochairchéim i gceist leis an bpróiseas iarratais, atá leagtha amach anseo.

### (a) Teastas Eorpach na Gaeilge (TEG) do gach iarrthóir

Tabhair faoi deara nach mór an chomhpháirt cainte de scrúdú Gaeilge Theastas Eorpach na Gaeilge ag Meánleibhéal 1 (B1) a bheith **curtha i gcrích** ag gach iarratasóir ionchasach, agus grád atá cothrom le 65% nó níos airde a bheith bainte amach acu, roimh an dáta deiridh le haghaidh iarratais a chur isteach (29 Márta 2022) chun na riachtanais iontrála a chomhlíonadh.

Ní mór d'iarratasóirí iarratas a dhéanamh ar leithligh chun tabhairt faoi scrúdú cainte Gaeilge Theastas Eorpach na Gaeilge, atá á riar ag Lárionad na Gaeilge: Taighde, Teagasc agus Tástáil in Ollscoil Mhá Nuad.

Is é **an Chéadaoin an 5 Eanáir 2022** an dáta deiridh le haghaidh iarratas a dhéanamh ar scrúdú cainte Gaeilge Theastas Eorpach na Gaeilge más mian leat bheith incháilithe le haghaidh iarratas a dhéanamh ar an Máistir Gairmiúil san Oideachas sa bhliain 2022. Is féidir le hiarrthóirí clárú ag an **nasc seo**.

Tá tuilleadh faisnéise, lena n-áirítear treoirlínte scrúdaithe, ar fáil anseo: <http://www.teg.ie/about-exams/teg-pme-primary-teaching.860.html>

### (b) Iarratais chuig gach Institiúid Ardoideachais.

Ní mór d'iarratasóirí iarratas a dhéanamh chuig a n-institiúid roghnaithe go díreach mar a leanas:

- Ba cheart iarratais chuig **Coláiste Mhuire gan Smál, Luimneach**, a dhéanamh ach an rannán '**How to Apply**' ar leathanach chúrsa an Mháistir Ghairmiúil san Oideachas ag <https://www.mic.ul.ie/pme> a úsáid.
- Ba cheart iarratais chuig **Institiúid Oideachais Ollscoil Chathair Bhaile Átha Cliath** a dhéanamh tríd an Ionad Iarratas Iarchéime ag [www.pac.ie/dcu](http://www.pac.ie/dcu). (Cód cúrsa: DC970). Ní mór na doiciméid tacaíochta uile a chur isteach trí Pac.ie faoi dháta deiridh an chúrsa.
- Ba cheart iarratais chuig **Roinn Froebel don Oideachas Bunscoile agus Luath-Óige, Ollscoil Mhá Nuad**, agus chuig **Institiúid Oideachais Marino, Baile Átha Cliath**, a chomhlánú ar líne ag [maestro.mie.ie/appcentre](http://maestro.mie.ie/appcentre).

Is é **5pm Dé Máirt an 29 Márta 2022** an t-am deiridh le haghaidh iarratais chomhlánaithe chuig na ceithre institiúid thuas a fháil.

Ba cheart do gach iarratasóir an nós imeachta roghnúcháin atá mionsonraithe i rannán 4 thíos a thabhairt faoi deara.

### 3. Coinníollacha Incháilitheachta

Ceanglófar ar iarratasóirí fianaise dhoiciméadach a thabhairt dá n-institiúid ardoideachais roghnaithe á thaispeáint go gcomhlíonann siad na riachtanais ag (a), (b) agus (c) thíos mar a leanas.

#### (a) Scrúdú Cainte Gaeilge

Ní mór d'iarratasóirí 65% nó níos airde a bhaint amach sa chomhpháirt cainte de scrúdú Gaeilge Theastas Eorpach na Gaeilge ag Meánleibhéal 1 (B1) roimh an dáta deiridh le haghaidh iarratais a chur isteach (29 Márta 2022) chun na riachtanais iontrála a chomhlíonadh.

Tá clárú ar oscailt anois le haghaidh scrúduithe Theastas Eorpach na Gaeilge agus is é **an Chéadaoin an 5 Eanáir 2022** an dáta deiridh le haghaidh iarratais ar líne ar Theastas Eorpach na Gaeilge a chur isteach. Is féidir leat clárú don scrúdú seo ag **an nasc seo**.

Beidh toradh rathúil i scrúdú cainte Theastas Eorpach na Gaeilge bailí ar feadh dhá bhliain sular ghá an scrúdú a athdhéanamh. Maidir le hiarrthóirí a bhain 65% ar a laghad amach i scrúdú cainte Theastas Eorpach na Gaeilge sa dá bhliain dheireanacha seo, tá siad incháilithe le haghaidh iarratas a dhéanamh.

Beidh an Scrúdú Cainte Gaeilge comhdhéanta díobh seo:-

- comhrá ar thopaicí saoil laethúil, ag tabhairt eolais agus ag cur tuairimí in iúl;
- rólghníomhaíocht ar chás ar leith, ag iarraidh eolais, ag tabhairt eolais agus ag cur tuairimí in iúl;
- scéal simplí a insint, á thuairisciú cad atá ag tarlú i sraith pictiúr.

Ba cheart d'iarratasóirí a thabhairt faoi deara go dteastaíonn ardchaighdeán líofachta sa Scrúdú Cainte Gaeilge agus ba cheart dóibh ullmhú don scrúdú dá réir.

Féach [http://www.teg.ie/fileupload/guides/B1\\_treoir\\_PME\\_EN.pdf](http://www.teg.ie/fileupload/guides/B1_treoir_PME_EN.pdf) le haghaidh tuilleadh faisnéise.

**AGUS**

**(b) Íosriachtanais Iontrála i nGaeilge, i mBéarla agus i Matamaitic.**

Ceann amháin de na tacair cháilíochtaí dara leibhéal seo a leanas:

(i) i Scrúdú na hArdteistiméireachta

Ábhar	Gaeilge	Matamaitic	Béarla
Grád Íosta	H4	H7 nó O4	H7 nó O4
Marc céatadánach	60% < 70%	30% < 40% nó 60% < 70%	30% < 40% nó 60% < 70%

H– Ardleibhéal

O – Gnáthleibhéal

Is leagtha amach in Aguisín 1 atá na gráid agus na marcanna céatadánacha sa scéim grádaithe don tréimhse 1992-2016 agus sa scéim nua don bhliain 2017 i leith

(ii) i Scrúduithe Leibhéal GCSE agus Ard-Leibhéal GCE i dTuaisceart Éireann: Grád C ag Ard-Leibhéal GCE i nGaeilge; Grád C ag Leibhéal GCSE i mBéarla agus i Litríocht an Bhéarla araon nó Grád B ag Leibhéal GCSE i gceachtar díobh; agus Grád D ag Leibhéal GCSE i Matamaitic Bhreise nó Grád C ag Leibhéal GCSE i Matamaitic.

**Roghanna eile ar cháilíocht dara leibhéal i nGaeilge, i mBéarla nó i Matamaitic**

Glacfar le Pas i Scrúdú *Chéad Bhliain na nEalaíon* ar an Ollscoil (15 chreidiúint ar a laghad ar an gCóras Eorpach Aistrithe Creidiúna) i nGaeilge, i mBéarla nó i Matamaitic in ionad riachtanas Scrúdú na hArdteistiméireachta nó GCE/GCSE don ábhar ábhartha.

**Roghanna eile ar cháilíocht dara leibhéal i nGaeilge**

- Grád C a gnóthaíodh sa Scrúdú Máithreánach (a reáchtáladh go dtí an bhliain 1992)
- Diplóma sa Ghaeilge, Leibhéal C1, Ollscoil na hÉireann, Gaillimh
- Diplóma sa Ghaeilge, Leibhéal B2, Ollscoil na hÉireann, Gaillimh
- Diplóma sa Ghaeilge, Ollscoil Mhá Nuad
- Teastas Eorpach na Gaeilge (TEG) ag Leibhéal B2, Ollscoil Mhá Nuad
- Diplóma sna hEalaíona (An Ghaeilge Fheidhmeach), Coláiste na hOllscoile, Corcaigh
- Diplóma sa Ghaeilge Fheidhmeach, an Coláiste Ollscoile, Baile Átha Cliath

- Dioplóma sa Ghaeilge (An Ghaeilge sa Saol Comhaimseartha), Ollscoil Luimnigh
- Dioplóma sa Ghaeilge in Ollscoil Uladh

### **Roghanna eile ar cháilíocht dara leibhéal i Matamaitic**

- Grád Pas a gnóthaíodh i Matamaitic sa Scrúdú Máithreánach (a reáchtáladh go dtí an bhliain 1992).
- Pas le tuillteanas (65-79%) nó pas le gradam (80-100%) a gnóthaíodh i gCúrsa Matamaitice ag Leibhéal 5 ó Dhearbhú Cáilíochta agus Cáilíochtaí Éireann (5N 1833).

Faoin 29 Márta 2022, ní mór d'iarrthóirí fianaise dhoiciméadach a thabhairt dá n-institiúid ardoideachais roghnaithe á thaispeáint (a) gur chomhlíon siad na híosriachtanais iontrála nó (b) gur rollaigh siad ar chlár staidéir agus/nó gur chláraigh siad chun tabhairt faoi cheann amháin de na scrúduithe malartacha formheasta i mBéarla, i nGaeilge nó i Matamaitic (mar atá liostaithe thuas), dá mbeidh torthaí scrúdaithe ar fáil roimh an 1 Iúil 2022.

Is é an 15 Iúil 2022 an dáta deiridh ar a bhféadfaidh iarrthóirí fianaise dhoiciméadach (tras-scríbhinn torthaí) a thabhairt dá n-institiúid ardoideachais roghnaithe á thaispeáint gur chomhlíon siad na híosriachtanais iontrála nó rogha fhortheasta eile.

**Tabhair faoi deara** go bhfuil scrúdú cainte (B1) Theastas Eorpach na Gaeilge (dá dtagraítear i rannán 3(a) thuas) ar leithligh ó na scrúduithe malartacha formheasta atá liostaithe sa rannán seo agus nach mór 65% nó níos airde a bhaint amach sa chomhpháirt cainte den scrúdú sin roimh an dáta deiridh le haghaidh iarratais a chur isteach, arb é an 29 Márta 2022 é. Mar atá leagtha amach i rannán 3(a) thuas, is é **an Chéadaoin an 5 Eanáir 2022** an dáta deiridh le haghaidh iarratais ar líne ar Theastas Eorpach na Gaeilge a chur isteach.

**AGUS, DE BHREIS AIR SIN,**

### **(c) Cáilíocht Acadúil**

Ní mór d'iarratasóirí na nithe seo a bheith acu:

- **Céim Onóracha Bhaitisiléara 2.2 ar a laghad** (Mórdhámhachtain ag Leibhéal 8 nó níos airde ar an gCreat Náisiúnta Cáilíochtaí) a bhfuil ualú creidiúna ar an gCóras Eorpach Aistrithe Creidiúna atá cothrom le 180 creidiúint aici faoin **Aoine an 15 Iúil 2022**

Ní mór d'iarratasóirí fianaise a thabhairt dá n-institiúid ardoideachais roghnaithe á thaispeáint go sonraítear a gcéim a bheith ina mórdhámhachtain ag an leibhéal cuí ar an gCreat Náisiúnta Cáilíochtaí.

## **Achoimre ar na dátaí tábhachtacha maidir le d'arratas ar an Máistir Gairmiúil san Oideachas.**

- Ní mór an t-íosleibhéal riachtanach de 65% nó níos airde a bhaint amach sa chomhpháirt cainte de scrúdú Gaeilge Theastas Eorpach na Gaeilge ag Meánleibhéal 1 (B1) roimh an dáta deiridh le haghaidh iarratais a chur isteach, arb é an 29 Márta 2022 é. Is é **an Chéadaoin an 5 Eanáir 2022** an dáta deiridh le haghaidh iarratas a dhéanamh ar scrúdú cainte Gaeilge Theastas Eorpach na Gaeilge.
- Is é an 29 Márta 2022 an dáta deiridh ar a bhféadfaidh iarrthóirí fianaise dhoiciméadach a thabhairt dá n-institiúid ardoideachais roghnaithe á thaispeáint (a) gur chomhlíon siad na híosriachtanais iontrála nó (b) gur rollaigh siad ar chlár staidéir agus/nó gur chláraigh siad chun tabhairt faoi cheann amháin de na scrúduithe malartacha formheasta i nGaeilge, i mBéarla, nó i Matamaitic (mar atá liostaithe thuas), dá mbeidh torthaí scrúdaithe ar fáil roimh an 1 Iúil 2022.
- Is é an **15 Iúil 2022** an dáta deiridh ar a bhféadfaidh iarrthóirí fianaise dhoiciméadach (tras-scríbhinn torthaí) a thabhairt dá n-institiúid ardoideachais roghnaithe á thaispeáint gur chomhlíon siad na híosriachtanais iontrála i nGaeilge, i mBéarla agus i Matamaitic nó rogha fhortheasta eile.
- Ní mór **cáilíocht acadúil** atá cothrom le Céim Onóracha Bhaitisiléara 2.2 (Mórdhámhachtain ag Leibhéal 8 nó níos airde ar an gCreat Náisiúnta Cáilíochtaí) a chomhlíonadh faoin **15 Iúil 2022**.

**Tábhachtach:** Is ar an iarrthóir féin atá an fhreagracht as a chinntiú go gcomhlíonann sé/sí na riachtanais incháilitheachta don chlár.

## **4. An Nós Imeachta Roghnúcháin**

### **Agallamh**

Ceanglófar ar iarratasóirí incháilithe dul faoi agallamh. Is i mBéarla a sheolfar an t-agallamh sin. Féadfar suas le 100 marc a bhronnadh i leith feidhmíocht san agallamh. Déanfar aon iarratasóirí a dteipfidh orthu san agallamh a chur amach as an gcomórtas. Is é cuspóir an agallaimh a fháil amach cé chomh hoiriúnach agus atá an t-iarratasóir do pháirt a ghlacadh i gclár oideachas bunmhúinteoirí.

**Bronnfar marcanna breise ar mhic léinn a n-éireoidh leo ardscore a bhaint amach i scrúdú cainte Theastas Eorpach na Gaeilge.**

- Féadfar suas le 10 marc bhreise a bhronnadh ar mhic léinn a n-éireoidh leo ardscore a bhaint amach i scrúdú cainte Theastas Eorpach na Gaeilge, agus cuirfear na marcanna sin lena score don agallamh. Bronnfar 10 marc bhreise

ar iarrthóirí a bhainfidh idir 90% agus 100% amach agus bronnfar 5 mharc bhreise ar iarrthóirí a bhainfidh idir 80% agus 89% amach.

- Cé nach mbronnfar aon mharcanna breise ar iarrthóirí a bhainfidh idir 65% agus 79% amach i scrúdú cainte Theastas Eorpach na Gaeilge, measfar go bhfuair siad pas sa scrúdú agus beidh siad incháilithe don chlár.
- Bronnfar 10 marc bhreise ar iarrthóirí a gheobhaidh pas sna leibhéal is airde (B2, C1 agus C2) de Theastas Eorpach na Gaeilge.

### **Láithreacha Agallaimh**

Féadfar agallaimh a thionól go cianda nó i bpearsa, de réir treoir ón Rialtas. Más rud é go dtionólfar an t-agallamh i bpearsa, is i mBaile Átha Cliath agus/nó i Maigh Nuad agus/nó i Luimneach a thionólfar é.

Cuirfidh an Institiúid Ardoideachais lena mbaineann iarratasóirí ar an eolas faoi dháta, am agus ionad tionóil an agallaimh, i measc nithe eile. Ní aisíocfar le hiarratasóirí aon chostais a thabhoífar de bharr an agallaimh.

### **5. Faisnéis Ghinearálta**

#### **Tréimhse Foghlama sa Ghaeltacht:**

Ceanglófar ar gach mac léinn a ligfear isteach i gclár an Mháistir Ghairmiúil san Oideachas dhá shocrúchán a chur i gcrích sa Ghaeltacht. Mairfidh gach socrúchán tréimhse dhá sheachtain. Is cuid éigeantach den chlár é sin agus ní mór do gach mac léinn oideachas tosaigh bunmhúinteoirí é a chur i gcrích.

#### ***Deontas Gaeltachta***

Le héifeacht ón mbliain acadúil 2020/21, tá deontas iníoctha ag an Roinn Oideachais le mic léinn i leith freastal ar an Tréimhse Foghlama sa Ghaeltacht.

Chun leas a bhaint as an deontas sin, ní mór do mhic léinn a bheith ag freastal ar cheann amháin de na ceithre sholáthraí Oideachas Tosaigh Bunmhúinteoirí atá á gcistiú ag an Stát: -

- Ollscoil Chathair Bhaile Átha Cliath (DCU)
- Coláiste Mhuire gan Smál
- Institiúid Oideachais Marino
- Roinn Froebel don Oideachas Bunscoile agus Luath-Óige, Ollscoil Mhá Nuad

#### **Deontais Mac Léinn:**

Is é SUSI (Tacaíocht Chomhchoiteann do Mhic Léinn in Éirinn) an t-údarás dámhachtana náisiúnta aonair do gach deontas ardoideachais agus breisoideachais. Beidh tuilleadh faisnéise maidir leis an Scéim Deontas Mac

Léinn don bhliain acadúil 2022/2023 ar fáil sna míonna atá romhainn ar shuíomh Gréasáin SUSI ag [www.susi.ie](http://www.susi.ie)

**Feidhmiúlacht chun Cleachtadh:**

1. *Grinnfhiosrúchán an Gharda Síochána*: Sula bhféadfar clárú mic léinn a chur i gcrích, ní mór don mhac léinn dul faoi phróiseas ghrinnfhiosrúchán an Gharda Síochána chun a shuí cé acu atá nó nach bhfuil aon chiontuíthe aige/aici nó cé acu atá nó nach bhfuil aon chúisimh choiriúla ar feitheamh ina leith. I gcás go ndeimhneofar sa phróiseas sin gurb ann do chiontuíthe nó do chúisimh den sórt sin, tarchuirfear an ní chuig Coiste Grinnfhiosrúcháin laistigh den institiúid ardoideachais, a chinnfidh ansin cé acu a fhéadfaidh nó nach bhféadfaidh an mac léinn leanúint lena c(h)lár staidéir.

2. *Ceanglais Leighis*: Ceanglaítear ar roinnt mac léinn oideachas múinteoirí atá ag teacht isteach Foirm um Fhaisnéis faoi Stádas Sláinte a chomhlánú, á chur in iúl cé acu atá nó nach bhfuil aon tinnis nó míchumais shuntasacha leanúnacha orthu a d'fhéadfadh tionchar díobhálach a imirt ar an gcumas atá acu ceanglais an chláir, lena n-áirítear an Socrúchán Scoile, a chur i gcrích. Maidir le hiontrálaithe a dhearbhóidh go bhfuil riochtaí suntasacha sláinte, míchumais shuntasacha nó riochtaí suntasacha síceolaíocha orthu, déanfar measúnú orthu ar bhonn aonair chun a mheas cé acu a bheadh nó nach mbeadh cumas acu éilimh an chláir a chomhlíonadh dá gcuirfí socruithe réasúnacha i bhfeidhm dóibh. Ní eisiafar aon duine aonair ar an bhforas go bhfuil riocht nó míchumas ar leith air/uirthi i gcás go measfar gur dóigh go mbeadh an duine sin in ann ceanglais an chláir a chomhlíonadh dá gcuirfí socruithe réasúnacha i bhfeidhm dó/di. Cuirfidh institiúidí ardoideachais mic léinn ar an eolas faoin nós imeachta atá le leanúint ina leith sin.

Le linn an chláir lánaimseartha oideachas múinteoirí seo, **ní fhéadfaidh** rannpháirtithe gabháil d'aon ghnó ná d'aon chlár staidéir eile gan cead a fháil roimh ré ó Uachtarán/Ceann Roinne na hinstitiúide ardoideachais.

Tá tuilleadh faisnéise maidir leis an gclár ar fáil ó institiúid ardoideachais roghnaithe an iarratasóra.



## Aguisín 1

### Scéimeanna Grádaithe na hArdteistiméireachta (an Scéim don tréimhse 1992-2016 agus an Scéim Nua don bhliain 2017 i leith)

<b>An Scéim don tréimhse 1992 – 2016</b>	<b>% a Bronnadh</b>	<b>An Scéim Nua don bhliain 2017 i leith</b>	<b>% a Bronnadh</b>
A1	90-100	A1/G1	90-100
A2	85<90	A2/G2	80<90
B1	80<85		
B2	75<80	A3/G3	70<80
B3	70<75		
C1	65<70	A4/G4	60<70
C2	60<65		
C3	55<60	A5/G5	50<60
D1	50<55		
D2	45<50	A6/G6	40<50
D3	40<45		
E	25<40	A7/G7	30<40
F	10<25	A8/G8	0<30